



## INTRODUCZIUN

DA SER JAN-ANDREA BERNHARD

*La lecziun entscheiva cul plaid «Mes cars», ed era jeu gitgel a vus:*

*«Mes cars! Seregurdeis dils plaid dalla davosa dumengia?» Gest ella lecziun dad oz vegn concretisau quei ch'ei stau annunziau la davosa dumengia (Heb 5). La differenza denter ils premsacerdots ch'ei pri ord la carstgaunadad ed il pli ault, sulet ver premsacerdot, Jesus Cristus. El ei buca «suttaposts alla fleivlezia», era sto el buca far unfrendas pils agens puccaus e per quels dil pievel, mobein el, Cristus, ha fatg unfrenda «inaga per adina» (Heb 7,27)*

*Ei quei buca in levgiament per nus? Nossa cardientscha enten Deus sto buca depender dil schinumnu «Bodenpersonal», da «scadin premsacerdot» (Heb 5,1), mobein astga sefidar dil premsacerdot ch'ei tschentaus da «perpeten».*

*Neve, mintgaton vein nus breigia culla baselgia e ses sacerdots, denton astgein – senza breigia! – sefidar dil premsacerdot Cristus. El ei gie era quel che ha «tut temps per interceder en nossa favur» (Heb 7,25). Dumandar astgein nus: Duvrein nus aunc enzatgei auter? Duvrein nus aunc enqual sogn ni enquala sontga sche Cristus ha tut temps per interceder en nossa favur?*

## 2. LECZIUN

*Heb 7,23–28*

Mes cars! El Vegl Testament ein biars daventai sacerdots, perquei ch'els ein adina puspei vegni impedi dalla mort da restar en uffeci. Mo Cristus posseda in sacerdozi nunvargheivel, tras quei ch'el resta en tutta perpetnadad.

Perquei sa el era spindrar per adina quels che s'approximeschan tras el a Diu; el viva gie da tut temps per interceder en lur favur.

Ual d'in tal premsacerdot vevan nus basegns, dad in ch'ei sogns, innocents, senza macla, separaus dils puccaus ed alzaus sur ils tschiels; in che senta buca mintga di la necessitad da far sco ils premsacerdots igl emprem unfrendas pils agens puccaus e suenter per quels dil pievel; pertgei quei ha Cristus fatg inaga per adina cun unfrir sesez.

La lescha ha numnadamein constituiu sco premsacerdots carstgauns ch'ei suttaposts alla fleivlezia; il plaid digl engriment denton ch'ei vegnius suenter la lescha, ha tschenta il Fegl ch'ei perfetgs en perpeten.